



Broj: 01,03,03/11-05-1-2928/17

Sarajevo, 2.4.2018.

**KOLEGIJU PREDSTAVNIČKOG DOMA PSBiH  
KOLEGIJU DOMA NARODA PSBiH  
KOLEGIJU SEKRETARIJATA PSBiH**

**Izveštaj sa zasjedanja Komiteta za parlamentarna pitanja Parlamentarne skupštine  
Frankofonije  
Brisel (Belgija)  
21.-23. mart 2018.**

U zgradi Parlamenta Federacije Valonija - Brisel u Briselu je od 21. do 23. marta 2018. održano zasjedanje Komiteta za parlamentarna pitanja Parlamentarne skupštine Frankofonije (u daljnjem tekstu: PSF) u čijem radu je učestvovala i Mensura Beganović, članica Delegacije Parlamentarne skupštine BiH u PSF-u.

Komitet je usvojio zapisnik sjednice održane u Luksemburgu u julu prošle godine.

Zatim su, uz prisustvo eksperata, razmatrani prijedlozi izvještaja koji će biti razmatrani tokom plenarnog zasjedanja Skupštine koje će u julu biti održano u Kvebeku (Kanada). Razmatran je izvještaj o zaštiti ličnih podataka u frankofonskom području, koji je predstavio Jean-Philippe Walter, federalni direktor za lične podatke iz Švicarske i predsjednik Frankofonskog udruženja tijela za zaštitu ličnih podataka (AFAPDP). Posebno je naglašeno da se moraju ojačati tijela države za zaštitu ličnih podataka. Konstatirano je da postoji direktiva EU o zaštiti ličnih podataka i da će nova direktiva EU za ovu oblast na snagu stupiti 25. maja 2018. U Africi postoji organizirana mreža zemalja koja se bavi istom problematikom. Zaključeno je da će na godišnjem plenarnom zasjedanju u Kvebeku biti donesena rezolucija o sigurnosti i zaštiti ličnih podataka. Tokom rasprave posebno se razgovaralo o nedavnom slučaju u kojem je facebook prekršio regulative u vezi sa zaštitom ličnih podataka, nakon čega je kompanija kažnjena upravo u Belgiji ogromnom novčanom kaznom.

Potom su parlamentarci imali priliku čuti izvještaj o etičkom kodeksu u parlamentarnim tijelima, koja su često nezavisna i rade u sklopu parlamenta. Ova tijela čiji je cilj pomoć i zaštita parlamentaraca u slučajevima kada su izloženi neprimjerenim napadima, naročito medija. Izvještaj je prezentirao Jean Roussel, parlamentarac iz Kvebeka, a izlagali su još i Ariane Mignolet, komesarka za etiku iz Kvebeka, i Agnes Roblot-Troizier, stručnjak za poslovnu etiku u Nacionalnoj skupštini Francuske. Oni su, između ostalog, govorili i o etičkom kodeksu u vezi s obavezom parlamentaraca prilikom prijavljivanja imovine i utvrđivanja sukoba interesa.

Francuska senatorka Claudine Lepage prezentirala je izvještaj o parlamentarnom predstavljanju ekspatriada u frankofonskom prostoru, a članica Parlamenta Federacije Valonija - Brisel Nadia El

Yousfi predstavila je izvještaj o ulozi parlamenta i parlamentaraca u uspostavljanju ravnoteže zakonodavne i izvršne vlasti.

Posebnu pažnju članova Komiteta izazvalo je obraćanje Stephanea Lopeza, stalnog predstavnika Međunarodne organizacije Frankofonije (OIF) pri Evropskoj uniji koji je govorio o uticaju francuskog jezika i frankofonske zajednice, kako u Evropskom parlamentu i u Evropi tako i u cijelom svijetu upravo djelovanjem Evropskog parlamenta. Opći zaključak je da frankofonska zajednica sve više gubi uticaj u pojedinim regionima kao npr. na Zapadnom Balkanu, s obzirom na rastuću uključenost na svjetskoj političkoj sceni Kine, Rusije, Turske i arapskog svijeta. Članice Frankofonije moraju ostati čvrsto povezane i zajednički raditi na zaštiti pojedinačnih i zajedničkih frankofonskih vrijednosti. Razgovarano je i o programima parlamentarne saradnje, frankofonskim izbornim misijama, programu rada za naredni period, parlamentarnim seminarima i obukama.

Značajan prostor posvećen je multilateralnim programima frankofonskog parlamentarnog razvoja, odnosu između Frankofonskog parlamenta mladih i nacionalnih parlamenata mladih, te programu Mladi frankofonski parlamentarci. Parlamentarci su raspravljali i o praćenju strateškog okvira PSF-a, odnosno o studiji o potrebama frankofonskih parlamenata u oblasti komparativnog prava. Članovi Komiteta iznijeli su svoje prijedloge o kojima bi se moglo razgovarati na XVII. samitu Frankofonije čija će osnovna tema biti „Živjeti zajedno u solidarnosti, diobi humanističkih vrijednosti i poštivanju različitosti: izvor mira i napretka za frankofonski prostor“.

S obzirom da je 20. mart Međunarodni dan Frankofonije, posebna pažnja posvećena je kulturnim događajima kojima je obilježen taj dan u Briselu pod generalnim motom slavljenja francuskog jezika i zajedničkog življenja.

### **Izvještaj pripremio:**

**Adnan Bešić**

**Sektor za međunarodne odnose i protokol PSBiH**

Dostaviti:

- naslovu
- članovima Delegacije PSBiH u Parlamentarnoj skupštini Frankofonije
- Komisiji za vanjske poslove Predstavničkog doma PSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću
- Sektoru za međunarodne odnose i protokol